



Daxmeh naeuz, gou doekseng seiz, gwndaenj caengz suenq gig ndei. Maj ndaej cibsam ndwen, cij rox byaij loh rox gangj vah, vunz maj ndaej daemqdetdet, iqet, dux gaeqboux iet hoz cungj beij gou sang.

Lij iq seiz roxnyinh yienghyiengh dwglau. Gou lau doek raemx, lau feiz coemh, lau deng nyzdoih hangz, lij lau fangz dem.

Seizhaenx mbouj rox dingq bouxlawz naeuz, vunz dai bae le couh bienqbaenz dufangz, mbwn laep couh okdaej youzlangh haih vunz. Gou dingq le, lau yaek dai bae, ndaw mbanj miz vunz dai roxnaeuz mbwn ngamq fuemx, gou couh gven dou youq ranz mbouj gamj okbae.

Ngoenzhaenx, caeuq gyoengq nyzdoih guhcaemz ndaej naemq, mbwn laepdingh cij gipmuengz buet coh ranz. Gou ngamq daengz bakdou ranz, ndawranz dienhaeng rongh dwk, mbouj raen vunz. Roxnaeuz daxmeh gaenq umj daegnuengx haeuj mbonq ninz lo. Gou muenghmuengh seiqhenz, hix mbouj raen daxboh youq gyawz, roxnaeuz de faeg lwgmaenz bae gueng dux douqbwn lajriengh lo. Naemj daengz neix, gou yimzymz byaij daengz ranzdajcawj, muengh roengz lajriengh bae. Lajriengh caeuq ranzdajcawj doxdoeng, lajde mbouj beng sienq cang dienhaeng, doengx-ngoengz doengxhaemh laepfubfub. Bohmeh youq gizhaenx ciengx douq-bwn, daengx ranz baengh raed bwn douq gai aeu ngaenz cawx gyu youz.

Gou baez muengh neix, hwk ndaej mbei yaek dek bae, cij raen lajriengh miz aen ngaenz he doengh bae doengh dauq, mbouj raen vunz youq gyawz. Gou mbouj gamj heuh, gipmuengz buet ok rog ranz bae, naengh youq najranz diuz mieng diemheiq baegfofo, sim naemj: Dwg mbouj dwg raen gij doxgaiq uq haenx lo? Daxboh dwg mbouj dwg gaenq

deng gaemh bae? Gou mbouj gamj caiq naemj roengzbae, mbouj roxnyinh seizlawz couh youq ndaw mieng ninz ndaek bae lo.

Haemhhaenx, dwg daxboh daj ndaw mieng umj gou haeuj ranz bae ninz.

Haetlaeng gou dawz gijneix lwnh hawj daxboh nyi. Daxboh riu naeuz: “Lwghuk, haemhlwenz gou youq laj-riengh diemj daeng gueng dudzouq, mwngz dwg raen aen ngumhngaenz gou luba, lajmbwn mbouj miz maz fangz law.”

Gij vah daxboh hawj gou sim onj haujlai. Hoeng gvaqlaeng gou youh bungz baez “fangz” ndeu. Haemh ndeu mbwn gaenq fuemx lo, gou lij boux ndeu naengh youq bak mbanj gwnz ndaek rin hung guhcaemz.

Sawqmwh, gou raen daxgoeng hwet gungj, aen gyauej ndoqndatndat he byaij daej coh gou, gou hwk bak aj liux. Sim naemj: Dai lo, mbatneix caen raen fangz ok naj lo, boux neix mbouj dwg daxgoeng ndaw mbanj ngamq dai geij ngoenz haenx luma? De hix hwet gungj, hix daeq aen gyauej ndoqndatndat he.

Mbouj raen hix raen lo, gou simdingh roengzdaej, naemj yawj-yawj dufangz maj ndaej baenzlawz yiengh? De yaek gvaq gyawz bae? De siengj guhmaz? “Dufangz” yied byaij yied gyawj, aen da gou yied cengq yied hung, mbouj yaep saekdi.

“Dahniq, gou daj mbanj wnq daej, mbouj rox loh, aen ranz canghyw singq Lanz gvaq gyawz bae, gou bae aeu di yw fatsa.” Daxgoeng haenx cam naeuz.

Gou dingq dwg vunz gangj vah, muengz vix gvaq mbiengj he bae, daxgoeng haenx youh laebdaeb byaij bae lo.

Daxgoeng neix dwg vunz, mbouj dwg dufangz law! Gou miz di saet-muengh, youh miz di angq. Saet-

muengh dwg caengz raen dufangz maj yienghlawz gvaq, hix caengz raen miz byawz gaeb ndaej dufangz gvaq; angq dwg aen sim iqet gou ndaej rox, lajmbwn mbouj miz fangz, dwg vunz raeuz gag naemj okdaej yaeh vunz yaeh swheij.

Gou ciemhciemh majhung, cungj rox okrog bae dajgoeng laeug ngaenz lo. Nanz ndaej maranz, daxboh mbouj youq lo, lau daxmeh mbwq lai, gou cungj siengj lai buenx de geij ngoenz.

Daxmeh ciengx miz dux vaizdaeg hung he, aeu ngoenzngoengz gyaep haeuj ndaw lueg bae langh gwn nywj, bae rouh raemx. Vaizdaeg hung gwn nywj imq le, gaenx bae ra vaizmeh guhcaemz, doengxhaemh hawj daxmeh bae ra gig dwgrengz.

Doenghbaez, daxmeh aeu diuz cag youh hung youh raez he, gyauej he lamh dawz boekvaiz, gyauej he cug youq lajgoek faexcoengz, hawj dufangz gwn benq diegnywj giz gaenx, caj vaiz gwn sat le, youh senj bae lingh giz lamh. Hong reih nyaengq seiz, daxmeh couh langhbuengq dux vaizdaeg hung, youzcaih dux de bae gyawz cungj ndaej. Doengxhaemh haeuj ranz, daxmeh goq mbouj ndaej ndoet saek gaemz souh haexyangz, couh haeuj ndaw lueg bae ra vaiz.

Mboengqhaenx sou haexyangz sat youh sou haexnaz, daxmeh nyaengq lai, youh langhbuengq dux vaizdaeg hung lo. Haemh ndeu guhhong haeuj ranz, gou couh caeuq daxmeh haeuj ndaw lueg bae ra dux vaizdaeg hung.

Dou byaij gvaq geij goengq ndoi, mbouj raen dufangz bouxwnq, hix mbouj raen ngaenz dux vaizdaeg hung ranz dou. Mbwn fuemx lo, daxmeh naeuz: “Raeuz bae mbiengj lueg haenx aen mbanj he yawjyawj.”

Dou mehlwg ganj daengz mbanj haenx, raen dux vaizdaeg hung ranz dou youq bakdou rienghvaiz bouxwnq

lienx bae lienx dauq, daxmeh yaengx diuz bien baez fad, dux vaizdaeg hung couh saetdeuz, riengz dou baema lo.

Mbwn laepdingh lo, seiqlengq laepcupcp, caemrikrik, cij ndaejnyi sing byaij song mehlwg dou caeuq dux vaizdaeg hung.

Caeklaiq daxmeh miz aen dienhd- doengz he rongh loh, ciuq mbouj ndaej geij gya, hoeng cungj beij lumhlaep byaij loh ndei. Rumzhaemh ci gvaq byai faexcoengz yiengjsasa, gizgyae cienz daej geij sing roeggyaeuj-meuz heuh, hawj vunz miz di gyauej-mboeng.

“Hwhw, hwhw……” Gou caeuq daxmeh byaij gaenx diuz giuz ndeu, sawqmwh dingqnyi miz sing gyangz-rwdrwd he daj laj giuz cienz hwnj-daej.

Gou naeuz: “Meh, raeuz haemh-neix aiq caen dwg bungz fangz lo.”

Daxmeh naeuz: “Gou byaij baenz-ciuh loh hwnz, caengz raen maz gvaq, baezneix lauhei q caen raen fangz lo.”

Geij baez raen “fangz” mbouj dwg fangz, gou hix miz mbei lo, gou naeuz: “Raeuz roengz laj giuz bae yawjyawj gonq.” Gou byaij baihnaj, daxmeh gaenlaeng.

Gou gaem dienhd- doengz baez ciuq, doeksaet yat, dwg Goengbet ndaw mbanj guhdauh guhmo haenx! Goengbet gutgungq aen ndang baenz ndaek ndeu, bak aj dwk, buhvaq dumzswdswd, ndang saenzdedded.

“Goengbet, mwngz youq neix guh maz?” Gou cam naeuz.

“Hwhw, ngoenzneix gou daj ndaw lueg guhmo dauqma, mbwn laep lo, gou youh mbouj daiq dienhd- doengz, byaij dwk byaij dwk, laj din baez raeuz, doek roengz laj giuz daej lo. Aen soujgih gou hix mbouj rox sinz gvaq gizlawz bae, ra mbouj raen, yaek dwk dienhvah hix mbouj ndaej.” Goengbet bak ajngabngab naeuz.

“Aiyo, aiyo, in lai lo, in lai lo.” Goengbet youh gyangzrwdrwd hwnj-daej lo.

“Goengbet, mwngz dwg mbouj dwg deng dufangz moeb mwngz ha? Guh hangz neix mbouj dwg miz haujlai bingmax, cihgeij hix rox fap rox fouz luma? Mbouj hai okdaej loengh dux de?” Daxmeh cam naeuz.

“Gaej gangj lo, gwnzbiengz bae gyawz miz fangz, gou caengz raen dufangz lawz gvaq. Danghnaeuz haemhneix mbouj baengh sou song mehlwg, gou dai haeu dai naeuh cungj mbouj miz vunz rox nw!” Goengbet sing gangj iq youh nyieg.

Gou fuz Goengbet ndwn hwnj-daej, cam de byaij ndaej mbouj? Goengbet sawq baez he, naeuz yaengyaeng byaij cik din lij doengh ndaej.

Haemhhaenx gou fuz dwk Goengbet, sam boux yaengyaeng byaij youq gwnz roen lueg, ndaw mbanj vunz cungj ninz caem cij dauqma daengz ranz.

Gvaqlaeng, Goengbet mbouj bae mbanj guhdauh guhmo lo, de caeuq gyoengq goengdauh lingh guh yiengh saeh wnq bae lo.